



# 蕭宥 同學

客語 · 現代詩 · 學生組

第一名

得獎作品

## 生命个色

### 得獎感言

當榮幸做得在這擺閩客語文學獎裡背受著肯定，這擺个得獎項，毋單淨係對佢自家堅持母語書寫个鼓勵同支持，還分佢對客語文學个世界有過較大个好奇，乜當歡喜做得同恁多優秀个筆者共下交流自家个文學作品。

透過佢个作品，毋單止用自家个母語，乜用最真實个情感，表達自家在生活肚感受著个，過較深刻个表現心肝肚个想法。感謝閩客語文學獎，分佢做得有這恁難得个經驗，有機會講出自家對「生命」个看法同想像，通過對日常生活个描寫，結合抽象个生命觀點，分大家看著無共樣个作品。

對佢來講，客話，毋單止係一種表達自家想法个管道，乜係認識生活肚美好个方式，故所佢想愛用母語書寫，將自家對世界个認識、觀點，還有這特別个語言繼續傳承下去，分過較多人重新認識、抑係尋轉客話个靚。

# 生命个色

## 天光

日頭落山个時間係紅色个。  
出世个嬰兒仔嘖嘖滾  
嫩嫩面頰卵係紅色个。  
敢有麼人 想起紅色个目光  
心臟嘖嘖跳 囡起面頂个燒  
咚 咚  
紅色个聲音在圓身肚 拋拋滾  
開口敞大氣个感覺係紅色个。  
紅色係熱情个色。

## 當晝

土地醒來个時間係綠色个。  
細人仔撈起清清个塘水  
蚬仔同蓮塘水係綠色个。  
風个溫柔 帶來綠色个味緒  
樹樞頭犁犁 映等睡目个形  
咻 咻  
青草仔同樹葉仔偷偷仔 笑咧  
頭臥臥看等个光線係綠色个。  
綠色係恬靜个色。

## 臨暗

目陰目陽个時間係白色个。  
肚飢个嬰兒仔拚拚滾  
食等个奶汁係白色个。  
眼盯盯仔緊看 白色个矚燼  
汗水直直滴 浸過歸身个驚  
滴 嗒  
就發一隻淺淺个夢 目瞞瞞仔  
眠床項安心个感覺係白色个。  
白色係單純个色。

## 暗晡

星仔睡忒个時間係烏色个。  
細人仔涉過汶汶个泥水  
天頂同麻膠路係烏色个。  
雲个發譴 帶來烏色个面容  
漚雨猛猛涿 趕入停下个影  
嘩 嘩  
眠床底个東西蛇聲鬼噉 探頭  
眨目後聽著个聲音係烏色个。  
烏色係懊躁个色。

## 生命

嬰兒仔在嗷咗  
細人仔在涉水。  
風 吹向遠遠个雲曇  
雨 流過闊闊个平洋  
心寒膽顫个暗晡夜  
一儕人牽等你个手。

醒來个該一秒鐘，  
你敢識想過，  
生命，係麼个色？